

Okwukwo izi Ele Hiburu

Nhne gbasiri okwukwo izi ka

Okwukwo izi Ele Hiburu bu ke be gbaznenu ele Karaisi ele be neemegidne, ele zi nu ogwu nu be jaaghasa okwnata mkpoma nu Karaisi. Nye gbaru okwukwo ka naakanu be nu Jizosi Karaisi bu ezi oiyi Chiokike n'iwuru a. O negesi nhne ka, ke mbom, Jizosi bu Nnwọ Chiokike ke zi okwnukokwu, nye muhiaru obno nsni hite n'awhnuwhnu o gawheru. Lele Nnwọ Chiokike, Jizosi kakwo kpakara ele owhnurninya ke Tesitamenti Oknani, ma ele enine izi, ma Mozizi n'iwuru a. Ke ebo, Chiokike karu nu Jizosi bu nye arihna, nye obula ke kweru nu ya, jeenwehia ozhia nu mmehie.

Nye gbaru okwukwo izi ka kwuru oka gbasiri ele dikne ke okwnata ovu, ele gwuzoru kwem du n'enu. Be lekwasiri Jizosi anya, nu ruwhnu awnwhnu nu okpagbu be kpagburu be. O jiri odo aka nu nsni nu ezni mesni okwukwo izi a.

Nhne zi n'okwukwo izi ka

Karaisi bu oiyi Chiokike zuru ozu (1:1-3)

Karaisi kakwo ele enine izi (1:4--2:18)

Karaisi kakwo Mozizi nu Josua (3:1--4:13)

Karaisi bu nye risi arihna kakwo (4:14--7:28)

Ogba-njo-ehni Karaishi kakwo (8:1--9:22)

Arihna Karaishi kakwo (9:23--10:39)

Okwnata mkpoma bu risi nhne (11:1--12:29)

Mee nhne joso Chiokike n'onu (13:1-17)

Okpukpe nu oka ipne-aznu (13:18-25)

*Nnwọ a kakwo
ele ọwhnurninya*

¹ N'ige wheru ewhe, Chiokike kwunnu ele nda aị ọknani ọka agịda ige hite n'ọnu ele ọwhnurninya n'apna zị ichne ichne.

² Kọvu kịtna, n'ọbochi ipne-aznụ ka, o kwunnu aị ọka hite n'ọnu Nnwọ a Jizọsi, bụ nye ọ họhiaru ma ọ bụru nye jeeri kpakara mkpe, nye o hiri n'aka a kpụ ọwa.

³ O nwernu igwugwu Nda a. Nnwọ wam bụ nhne Nda a bụ. O ji ikwu-ọnu a ke nwernu iknernema jigidne kpakara nhne. O jiri aka a snụsnama mmehie ọwa. Nga o mekworu ka, ọ daziri ẹli n'akarikwnunga Chiokike n'oligwe, nye kakwo kpakara nhne n'olu.

*Nnwọ Chiokike kakwo
ele enine izi*

⁴ Nnwọ wam kakwo ele enine izi lele kpa rẹwhna a “Nnwọ,” ke Chiokike nyernu a kakwo rẹwhna be.

⁵ Kwnornu nụ ọ zá enine izi ọbula ke Chiokike kannụ,
“Ji bụ Nnwọ m.

M gholam Nda ị tna.”

Mọbu, ọ zị masị enine izi ke Chiokike kannụ,

“M jọoburunu ị Nda,
ị jọoburu Nnwọ m.”

⁶ Nga Chiokike neeziya Nnwọ a nụ rime ọwa, ọ kaa,

“Kpakara ele enine izi Chiokike kpọnu a risi ẹli.”

⁷ Ka bụ nhne Chiokike kwuru gbasiri ele enine izi,

“Chiokike mernu ele enine izi a lele ruwhere,
ele izi a lele bẹkwnu neerne erne.”

⁸ Kọvu nhne gbasiri Nnwọ wam, Chiokike karu,
 “Chiokike, ngadna eze i jaazi tim tọm,
 Mkpara ẹli-eze i bu ikpe zi snam.

⁹ I whnuru nhne oma n'anya, sno nhne ojo irno,
 kam kpayaru, Chiokike, bu Chiokike i teru i
 mono ovu oso n'onu,
 bita i nu hne kakwo kpakara ele ibne i.”

¹⁰ O kaa,
 “Ji Jihova, i turu ntẹ-ẹli owa hite nu mbom.
 I ji aka i lawuru kpu oligwe.

¹¹ Kpakara be joowhu, kovu i jaazi okwnukokwnu.
 Be jaaka buka lele iwo.

¹² I jaapiakota be lele iwo olu,
 be jaagbanwo be lele ikpe,
 kovu i zi kpa i zi nu mbom,
 onu ogwnugwnu awha i jeebi ebi.”

¹³ O za enine izi obula ke Chiokike kannu,
 “Daziri eli n'akarikwnunga m
 tem du nga me jaabita ele irno i
 lele nhne i jootukwasi ochi i lawuru.”

¹⁴ Ele enine izi, kpakara be buo ele o ziyaru o yinu
 ele jeekehia oznohia aka sa?

2

Okne oznohia wam

¹ Kam kpayaru, a jigidne ezi oka wam a nuru
 aka rikne, o zi be vume ai lele kpa mini noovume
 ogbo.

² O buru nu ikwu-onu ele enine izi kwuru
 gwuzosiri rikne, kpakara mmehie nu risi rikne
 naharu ogwo ernu awhnurhnu kwesiri be,

³ ndaa kpa a jaagbanahuru, o buru nu a lewhuru
 okne oznohia hna kpa anya? O bu ke Nyenwe ai

n'iwhuru a beru ọsno zni, ele nurnu a kannu aị nụ ọ bu ezi oka.

⁴ Chiokike gbannu be akebne hite nụ ọnu elekema zi ichne ichne ke rikne, nụ ọnu ndu-ehni, nụ ọnu rikne zi ichne ichne. Ọ gba masiri akebne nga o nyernu ele badnu nkesi ke Enine Nso lele kpa ọ masiri a.

Jizosi nu lele rumu nne a

⁵ Berere kwno, Chiokike bitage ele enine izi ele jaachi ọwa ke jaava, bu ọwa ke a nookwu oka a.

⁶ Kọvu be kwuru n'otu hnenum n'okwukwo nsọ, “Kini bu nhne badnu etekne bu, ke i naari oriri gbasiri a, nụ nnwo ke badnu ke i neelekota a?”

⁷ I mernu a o hietu eli mati karu ele enine izi. I jiri igwugwu nụ ọson'anya kpusi a nụ risi lele okpu-eze.

⁸ I mernu a nye risi kpakara nhne.”

Ka neegesi nụ ọ za nhne ọ sigbasiri ọ bita nụ mkpururu ọchi a. Kọvu kitna, a whnuge nụ kpakara nhne ka zi nụ mkpururu ọchi a.

⁹ Kọvu a whurnu Jizosi, nye o mernu hietu eli mati karu ele enine izi. O jiri igwugwu nụ ọson'anya kpusi a nụ risi lele okpu-eze kwnornu nụ ọ nwurnu ẹnwu. Hite n'oru Chiokike, o raturu ẹnwu riro kwnornu kpakara badnu.

¹⁰ Chiokike nwe kpakara nhne, ya ke masiri kpakara nhne hite n'iknernema a. O mernu nhne kwesiri nga o mernu Jizosi zu ozu hite n'awhnuwhnu, ma ọ znohia agida rumu Chiokike, mee be snornu a kehia igwe n'igwugwu a.

11 Kwnornu nụ nye bítaru be nsọ nụ ele be bítaru nsọ bụ otu ọro. Kam kpayarụ, o sukwu be rụmu nda a zá nọtụ a iwhnerne.

12 O karụ,

“M jookwupiya rẹwhna ị n'esilawuru rụmu nda m, m jaaznarni ị n'esilawuru ọgbako Chiokike.”

13 Berere kwno,

“M jọtukwasi a ovu,”

o kwu kwno,

“Le me nụ rụmu Chiokike nyernu m.”

14 Lele rụmu o sukwuru vugwu anọ-ẹhni nụ ọvnarna, Jizọsi ghoru badnụ ke vugwu anọ-ẹhni nụ ọvnarna ke nwernu rikne nwụ ẹnwu, ma hite n'ẹnwu a, o megbu nye wam bụ Ekwensu ke nwernu rikne ẹnwu,

15 ma ọ dọhia ele zị n'ọhi kpakara bụdnụ be n'ogwnu ẹnwu.

16 Kwnornu n'ezi, Jizọsi váge o yinu ele enine izi aka, kọvu rụmu avnurnu Ebereham.

17 Kam kpayarụ, ọ zị mkpa Jizọsi nụ lele rụmu nda a nụ apna ọbula, ma ọ bụru nye risi ariọhna ke nwernu mkpọma obirizi kwesiri ọkwnata ovu nụ ruwhnu Chiokike, ọ bụru masị nye mernu badnụ nụ Chiokike zịri n'udno hite nụ ọgbaru mmehie.

18 Kwnornu nụ o tarụ awhnụwhnu nga be rnarnụ a ọrnurna, o nwernu rikne yisinu ele be naarna ọrnurna aka.

3

Jizọsi kakwo Mozizi

1 Kam kpayarụ, rụmu nda m, ele zị nsọ, ele vu osukwu ikwu oligwe, anụ rị ọriri nhne gbasiri Jizọsi, nye izi, nụ nye risi ariọhna ke ọkwnata ovu aị.

² Ọ bụ nye kwesiri ọkwnata ovu nyee nye ọhíaru a, lele kpa Mozizi buri nye be tũkwasiri ovu nũ kpakara ẹrnu a n'oro Chiokike.

³ Jizosi kwesiri o nwe igwugwu ke kakwo igwugwu Mozizi lele kpa nye wuru ọro nwernu igwugwu karu ọro o wuru.

⁴ Kwnornu nũ kpakara ọro nwernu nye wuru a, kọvu Chiokike wuru kpakara nhne.

⁵ Mozizi, lele nnwọ izi be kwesiri ọ tũkwasi ovu nũ kpakara ọro a, gbaru akebne nhne be jookwu nũ ruwhnu.

⁶ Kọvu Karaisi kwesiri ọkwnata ovu lele nnwọ n'oro Nda a. A bũ ọro a, ọ bũru a bũta mkpoma siri rikne aĩ, gwuzosi masi rikne nũ nhne a neele anya a.

Ozukwa inwe ke rumu

Chiokike

⁷ Lele kpa Enine Nso karu,
“Tna, ọ bũru nũ anũ nũrnu nkoli a,

⁸ anũ mee ovu anũ si rikne,
lele kpa ele Izireli mernu nga be gwuzogidnernu
Chiokike,
ige ọrnurna n'eli-ikpa.

⁹ Nga ele nda anũ ọknani kparu m iru, kpahia m,
be whnurnu ẹrnu m nri awha ẹno.

¹⁰ Ovu weru m ẹhni kwnornu ebiri kam,
m kaa, ‘Mkpoma be noowhu apna,
be kwége ọ bũta iwu m.’

¹¹ Kam kpayarũ, m ji m ovu owe ẹhni du risi, kaa,
‘Be jaabna hne me jeenye be ozukwa inwe.’ ”

¹² Rumu nda m, anya du anũ eli, ọ zá nye ọbula
n'esilawuru anũ ke jeenwe ovu mmehie ke kwé

ekwe ke jeeme a ọ whọga nụ hne Chiokike ke zị bụdnu zị.

¹³ Kọvu anụ kwnagidne ibne anụ hnebuko ọbochi be kwuru “Tna.” Ọ zá nye kwe aghigho ke mmehie mee ovu a si rikne megidne Chiokike.

¹⁴ Kwnornu nụ ọ buru a jidne ọkwnata mkpọma a nwernu nụ mbom dụ okwukwo, aị nụ Karaisi jeekeko nhne.

¹⁵ Lele kpa be gbarụ n'okwukwo nsọ,
“Tna, ọ bụ nụ anụ nurnu nkoli a,
anụ mékọ ovu anụ si rikne
lele kpa ele Izireli mernu nga be gwuzogidnenu
Chiokike.”

¹⁶ Ndaa ele nurnu nkoli Chiokike mee risi rikne?
Ọ búo ele Mozizi hiri n'eli Ijipiti duhia sa?

¹⁷ Ndaa ele Chiokike wesanu ovu ehnri nri awha eno? Ọ búo ele mehieru, bụ ele iznu be dnarnu n'eli-ikpa?

¹⁸ Ndaa ele Chiokike duru risi nụ be jáabna nụ hne o jeenye be ozukwa inwe? Ọ búo ele bnóge nsni?

¹⁹ A whnurnu nụ be bnáge hne o jeenye be ozukwa inwe kwnornu nụ ókwe ekwe be.

4

¹ Chiokike kweru aị mkwna ọ bna n'ozukwa inwe a, mkwna wam noogwuzo kwem, anụ ngwa ma a tụ ogwnu, ọ zị otu nyenum n'esilawuru anụ ba adna nụ ọ bna nụ rime a.

² Kwnornu nụ be znirni aị izi oma lele kpa be znirni be. Kọvu izi be znirni be bnágene be nụ nhne, kwnornu nụ ele nurnu a jíle ọkwnata ovu naahoru a.

³ Kĩtna aị ele kweru bnarnụ n'ozukwa inwe a lele kpa Chiokike kwuru,

“M ji m ovu owe ẹhni dụ risi,

be jáabna hne me jeenye be ozukwa inwe.”

O kwuru ka, ọ bụ n'ezị nụ ẹrnu wam kwolem kpa ọ tūru ntụ-ẹli ọwa.

⁴ O kwuru ọka gbasịri ọbochi ke ẹsau n'otu hnanum, “Chiokike zukwaru inwe n'ọbochi ke ẹsau nụ kpakara ẹrnu a.”

⁵ Nụ hnam kwno, ọ kaa, “Be jáabna n'ozukwa inwe m.”

⁶ A whnurnu nụ ozukwa inwe zịnu ele ke Chiokike. Kọvu, ele nurnu izi ọma wam nụ mbom bnáge n'ozukwa inwe wam kwnornu n'ókwe ekwe be.

⁷ Chiokike bítaru ọbochi berere ele badnụ ji naabna n'ozukwa inwe a, kwu a “Tna.” Nga agida awha whemernu, o hi n'ọnu Devidi kwu lele kpa o kwuru nụ mbom,

“Tna, ọ bụru nụ anụ nurnu nkọli a,
anụ mée ovu anụ si rikne.”

⁸ Kwnornu nụ ọ bụru nụ Josua duru be bna n'ozukwa inwe, Chiokike bó kwule ọka gbasịri ọbochi ozukwa inwe berere.

⁹ Ka neegesi nụ ozukwa inwe berere zịnu rụmu Chiokike lele kpa Chiokike zukwaru inwe kpa o kekworu ọwa n'ọbochi ke ẹsau.

¹⁰ Nye ọbula ke bnarnụ n'ozukwa inwe ke Chiokike, noozukwa inwe nụ kpakara ẹrnu a lele kpa Chiokike zukwaru inwe n'ẹrnu a.

¹¹ A yisi ẹhni ma a bnazne n'ozukwa inwe a, ọ zị nye ọbula ba adna kwnornu nụ ókwe ekwe lele kpa rụmu Izireli dnarnụ.

12 Ikwu-ọnu Chiokike zị bụdnu nọornusi ẹnu rikne. Ọ zị bụko kakwo ama-ogwnu ruwhnu lawuru. Ọ nọodubna, neekewa mkpuru ovu nụ enine, ma ọkpukpu nụ ọmio. Ọ nọotupiya echiche ovu nụ agwa ke badnu.

13 Ọ zá nhne be keru eke ke tugwaru otugwa n'anya Chiokike, kpakara nhne gbe anya n'anya nye wam a jaasa ajiji gbasiri ẹhni aị.

Jizọsi bu nye risi ariohna

14 Hne a nwernu nye risi ariohna hna ezi kpa, nye beru ọsno zne nụ ruwhnu Chiokike n'oligwe, Jizọsi Karaisi Nnwọ Chiokike, a jidnesi okwuhia ke ọtukwasi ovu aị aka rikne.

15 Kwnornu nụ a nwée nye risi ariohna ke nhne gbasiri aị zá neemetu n'ovu, kovu a nwernu nye risi ariohna nye be kparu iru n'apna ọbula lele aị, kovu o méne mmehie.

16 Ngwa ma a gweru ovu siri rikne vadu ngadna oru ke Chiokike ma a nahia obirizi nụ oru jeeyinu aị aka n'ige mkpa.

5

1 Nye risi ariohna ọbula bu nye be hohiaru n'esilawuru ele badnu, be bita a ichne ma ọ dnasni anya badnu nụ ruwhnu Chiokike, naakwanu be ariohna nụ nkesi kwnornu mmehie.

2 O nwernu rikne gweru ovu ọma mesno ele nwée rikne nụ ele máa nhne n'apna ọbula, kwnornu nụ ya n'iwuru a zá rikne.

3 Kam kpayaru, ọ naakwa ariohna kwnornu mmehie ke a, nụ ke ele berere.

4 Ọ zá nye gweru igwugwu o chni ẹhni a nye risi ariohna, kọvu nye Chiokike sukwuru lele kpa o sukwuru Erọni.

5 Kpam masị, Karaịsi nyége ẹhni a igwugwu ke nye risi ariohna. Kọvu Chiokike kwuru nhne gbasịri a,

“Jị bụ Nnwọ m,

M ghọlam Nda ị tna.”

6 Chiokike kwu kwno nụ hne berere,

“Ị bụ nye ariohna ọkwnukokwnu,

n'ahịri ke Mẹkizedeki.”

7 Nga Karaịsi zị bụdnu n'ọwa, o ji okne ẹkwna nụ anya-mini rịo arịrio a n'okpukpe nyee Chiokike, bụ nye nwernu rikne ọ dọhia a n'ẹnwu. Ọ nūnu okpukpe a, kwnornu nụ o gwednarnu ẹhni a ẹli.

8 Ọ bụ n'ezi nụ Jizọsi bụ Nnwọ Chiokike, kọvu, ọ muhiaru obno nsni hite n'awhnụwhnu ọ taru.

9 Nga be mernu a ọ ziri snam, ọ ghọru nye risi ọznohia ọkwnukokwnu ke kpakara ele jobno nsni.

10 Chiokike mernu a ọ bụru nye risi ariohna n'ahịri Mẹkizedeki.

Ọdnahala aznụ

11 A nwernu agịda nhne a jookwu gbasịri Karaịsi nye risi ariohna n'ahịri Mẹkizedeki, kọvu a jókwu a kwnornu nụ anụ jéenwe rikne ghọhia be.

12 Kịtna, anụ kwesiri ọ bụru ele jeezni nhne, kọvu ọ zị kọriri mkpa be neezni anụ nhne mbọm ke ikwu-ọnu Chiokike. Ọ bụru nụ mini-rẹma bụ nhne anụ zị kọriri nọonwo, ọ bụo wiri siri rikne.

13 Kwnornu nụ nye ọbula ke nọonwo mini-rẹma bụ watakiri, o nwée rikne mahia nhne ọma nụ nhne bụo ọma.

14 Wiri siri rikne bu ke ele soru oso, bu ele be znurru o mahia nhne zi ichne nu hne nhne oma nu nhne ojo zi.

6

1 Ngwa ma a zne ruwhnu, a sigbasi iznizni mbom ke Karaisi zne nu ozu ozu, a zoma o tu ntu-eli otuhnasna nu mmehie berere hite n'ome nhne ke neegweya enwu, kweru nu Chiokike.

2 Ka bu iznizni ke owu mini nu ke obniakwasi aka nu risi, nu ke ohi n'enwu lizo, nu ke ikpe zi okwnukokwnu.

3 Chiokike kwe, a jeeme nhne ka.

4 O bu nhne kwé omume nu ele mahiaru iwhe ke Chiokike dnahnala, jeehieha, bu ele raturu nkesi oligwe riro, bu ele kehiaru igwe nu rime Enine Nso.

5 Ele ka bu ke raturu nhne oma ke ikwu-onu Chiokike riro ya nu iknernema ke owa ke jaava,

6 be hi nu ya dnahnala. O bu nhne jéekwe omume o kwuhnaya be, o nu lele be nokpogidne Nnwọ Chiokike n'olu ogba berere, naakpasị a iwhe-nerne nu ruwhnu ohna.

7 Eli ke nwornu mini ke noozokwasi a, naamipiya mkpuru ke bnannu ele ekwu iru, o nahia ngozi Chiokike.

8 Kovu eli ke nooru igwnu nu akikara bnage iru obula. Be jovu a onu, n'ipne-aznu, bekwnu jeerne a.

9 Kovu ele me whnuru n'anya, o bu n'ezi a nookwu kpa, a tukwasiri ovu nu nhne kakwo mma gbasiri anu, bu ngozi ke onohia nu mmehie.

¹⁰ Chiokike zá neeme nhne ojo. O jéechezu ẹrnu anụ ya nụ ọwhnun'anya anụ gesiri ẹwhna a, zị kọriri neegesi hne ele ke Chiokike zị.

¹¹ A noopio ma nye ọbula mee kọriri kpam dụ okwukwo, ma olile anya anụ zịri kwem.

¹² A píole anụ bụru ele ime-mgwụ, kọvu anụ nụ lele ele kweru ekwe nwe masị ndidi tem dụ ọ nahia mkwna Chiokike kweru.

Mkwana Chiokike zị kwem

¹³ Nga Chiokike kweru Eberham mkwna, o jiri ẹhni a dụ risi kwnornu nụ ọ zá nye berere kakwo a.

¹⁴ Ọ kaa, “N'ezi ọka, m jọgozi i, nyee i ọbuba masị.”

¹⁵ Eberham jiri ogologo nkasi ovu nwehia mkwna wam Chiokike kweru a.

¹⁶ Ele badnụ neeji nye kakwo be dụ risi, neemesi ọka be rikne, kam bụru mbimambi ọka nụ ọdogbuta.

¹⁷ Chiokike, ma o gesi ele jeekehia mkwna, nụ ọ jáagbanwo mkwna wam, jiri ẹwhna a dụ risi.

¹⁸ Chiokike nyernu aị mkwna a nụ ọ dụ risi a, nhne lawuru ka gbánwo agbanwo kwnornu nụ Chiokike jáagha aghalaghala, aị ele gbaznenu jigidne olile anya ke zị nụ ruwhnu aị aka ọ zị inwe gwụ aị.

¹⁹ A nwernu olile anya ka lele nkno ke mkpuru ovu, ke zị jji nụ kwem, ke dubnarnụ aị n'aznụ ikpe obnosni nụ rime hne zị nsọ,

²⁰ hne Jizọsi beru aị ọsno bnazne, bụru nye risi ariọhna ọkwnukokwnu n'ahiri Mẹkizedeki.

7

Mẹkizedeki, nye ariọhna

¹ Mèkizedeki ka bụ eze Salem, nye ariohna ke Chiokike ke Kakwo Nhne Dum Olu. O zuteru Ebereham nga o hiri ogwnu ke o gburu ele eze neehiehna, o gozi Ebereham.

² Ebereham nyee a otu nga nu nri nga kpakara nhne o gweyarụ. Rẹwhna a ke mbom bụ “Eze Ome Mma,” ke ebo bụ “Eze Salem,” ke bụ “Eze Udno.”

³ O zá otnutnu gbaka gbasiri nda a mọbu nne a, mọbu avnurnu a, omumu a, mọbu enwu a, lele Nnwọ Chiokike, o bụ nye ariohna okwnukokwnu.

⁴ Le nye kwu ka, ke nda a Ebereham nyegarụ a otu nga nu nri nga kpakara nhne o luhiaru n'ogwnu.

⁵ N'ezi oka, iwu karu rumu Livai ele ariohna nahoru rumu nda be otu nga nu nri nga. O bụ n'ezi nu be bụ rumu Ebereham.

⁶ Kovu Mèkizedeki híge nu avnurnu Livai, kovu o nahoru Ebereham otu nga nu nri nga, gozi masi nye wam nahiaru mkwna Chiokike.

⁷ N'ezi, nye wam ke goziri kakwo nye wam o goziri.

⁸ Hna, badnu etekne ke jonwu onwu nanarnu otu nga nu nri nga. Kovu hne berere, Mèkizedeki nye be gbaru akebne nu o jaazi tem nanarnu otu nga nu nri nga.

⁹ A jaaka nu nga Ebereham kwuru otu nga nu nri nga, nu Livai nye nanahoru otu nga nu nri nga kwuru ke a masi nu rime Ebereham,

¹⁰ kwnornu nu Livai zi nu ruwho Ebereham nda a nga Mèkizedeki zuteru Ebereham.

*Jizosi bu nye ariohna
lele Mèkizedeki*

¹¹ Be nyernu ele Izireli iwu hite n'ele ariohna Livai. O buru nu iwu ke mernu rumu Livai buru

ele ariohna mernu badnu zu ozu, o za mkpa nu nye ariohna berere jaava n'ahiri Mekizedeki, buo n'ahiri Eroni.

¹² Kwnornu nu kpa be gbanwornu ele ariohna, kpa masi bu kpa be jiri gbanwo iwu kam.

¹³ Nye a nookwu oka bu Nyenwe ai, nye hiri n'avnuonu berere, o za nye obula ke hiri n'avnuonu kam bu nye okwa ariohna.

¹⁴ A magwu nu Nyenwe ai hiri nu avnuonu Juda whuya, bu ele Mozizi kwuge nhne okwa ariohna gbasiri be.

¹⁵ Ka dnornu ai anya nkari nkari, kwnornu nu nye ariohna berere whuyaru lele Mekizedeki.

¹⁶ O buo nye ariohna hite n'iwu ke osnusno omumu ke badnu, kovu o bu nye ariohna hite nu iknerna bndu ke kwó okwo.

¹⁷ Kwnornu nu okwukwo nsó karu kpa,
“I bu nye ariohna okwnukokwnu,
n'ahiri Mekizedeki.”

¹⁸ Be sigbasiri iwu oknani kwnornu nu o za rikne, o bnáge iru obula,

¹⁹ kwnornu nu o za nhne ke iwu mernu ozu ozu. Kovu a nwernu olile anya ke ka mma ke a jeeji vadu Chiokike ndundu.

²⁰ Chiokike duru risi gbasiri a, ele berere buru ele ariohna hne be duge risi.

²¹ Jizosi bu nye ariohna Chiokike dunnu risi, kwu masi nhne gbasiri a,
“Jihova duru risi,
o jáalahna aznu,

‘I bu nye ariohna okwnukokwnu.’ ”

²² Kwnornu odu risi ka, Jizosi bu mbimambi ke ogba-njo-ehni ke kakwo mma.

23 Ele ariohna wam zi agida kwnornu nu be nwurnu onwu ke mernu be nwée rikne dazigidne lele ele ariohna.

24 Kovu Jizosi zi budnu okwnukokwnu, ernu ke nye ariohna a za naagbanwo agbanwo.

25 Kam kpayaru, o nwernu rikne o znohia kпам kпам bu ele hiri n'aka a vakwnusi Chiokike, kwnornu nu o zi budnu okwnukokwnu noorionu be aririo nu ruwhnu Chiokike.

26 A nwernu nye risi ariohna nu kpa, nye zi nsọ, nwée ntubo, nye mmehie zila nu rime, nye zi ichne hne ele badnu ele mmehie zi, nye be gwelizoru olu kakwo kpakara oligwe.

27 Jizosi nuna lele ele risi ariohna ele berere, o za naakwa ariohna kpakara obochi kwnornu mmehie ke a nu ke ele Izireli. Kovu o kwarnu otu ariohna kpoi ke zuru ohna nga o gweru ehni a kwa ariohna.

28 Kwnornu nu iwu mernu ele badnu ele zuge ozu ele risi ariohna, kovu ikwu-onu wam Chiokike jiri du risi ke sno iwu wam n'aznu mernu Nnwọ wam nye zuru ozu okwnukokwnu.

8

Jizosi bu nye risi ogba-njo-ehni ikne

1 Ka bu risi kpakara nhne a nookwu, a nwernu nye risi ariohna nu kpa, nye dazi n'akarikwnunga ngadna eze Chiokike n'oligwe.

2 Nye ariohna nu kpa zi noornu ernu nye ariohna nu Hne Kakwo Nsọ n'oligwe, bu ezi Oro-Eka Nsọ ke Nyenwe ai wuru, o bu la badnu.

³ Nye risi ariohna obula jaakwa ariohna nu nkesi nu ruwgnu Chiokike, o zi mkpa nu nye ka jeenweriri nhne o jeeji kwa ariohna.

⁴ O buru nu o zi n'owa, o jobu nye ariohna ria ria, kwnornu nu agida ele ariohna zi ele naakwa ariohna lele kpa Iwu Mozizi kwuru.

⁵ Be neezne izi n'Oro Nso ke nhne atu lele ke zi n'oligwe. Lele kpa Chiokike kannu Mozizi nga o noowu Oro-Eka Nso, "Whnu nu i mernu kpakara nhne lele kpa be gesiri i be n'olu rugwu."

⁶ Kovu ernu okwa ariohna ke Jizosi kakpa ke ele rnurnu ernu nu mkpururu iwu oknani. Ogba-njo-ehni ke o gbaru n'esilawuru Chiokike nu ele badnu kakwo mma, kwnornu nu o gwuzogwu n'olu mkwna ke kakwo mma.

⁷ O buru nu ogba-njo-ehni ke mbom zuru ozu, mkpa ke ebo be zene akpa ai.

⁸ Kovu Chiokike whurnu nu ele badnu zuge ozu, o kaa,

"Obochi wawa, bu nhne Jihova kwuru,
nga me nu oro Izireli nu oro Juda,
jaagba njo-ehni ikne.

⁹ O jonu lele njo-ehni,
me nu ele nda be gbaru,
n'obochi me jiri be n'aka m
dohia be n'eli Ijipiti,

be kwnatala ovu nu njo-ehni wam me nu be gbaru,
m lemernu m be anya,
bu nhne Jihova kwuru.

¹⁰ Kitna, ka bu njo-ehni me nu ele Izireli jaagba nu obochi ke jaava, bu nhne Jihova kwuru.
M jeeyisi iwu m nu rime echiche be,
m jaagbakwasị be n'olu mkpoma be,

m j̄oburu Chiokike be,
be j̄oburu ele ke m.

11 Ọ zá nye n'esilawuru be ke jeezni ibne a,
m̄obu kanu nwene a, 'Mahia Jihova,'

kwnornu nu kpakara be jaamahia m,
hite nu nye zi mati du nye ezi.

12 M jaagbaru nu be ogahie be,
m jeechenwanya mmehie be berere."

13 Hne o nookwu oka ogba-njo-ehni ikne,
Chiokike mernu ma ke mbom ziri oknani, nhne
obula mernu oknani jodoka odoka, whume masi.

9

Okpenu Chiokike n'owa

1 Ogba-njo-ehni ke mbom ke Chiokike nu rumu
Izireli gbaru nwernu iwu osnusno okpukpe n'oro
nsọ ke owa.

2 Be wuru oro okpukpe ke mbom ke bu hne zi
nsọ. Nu rime onu oro ke mbom, nhne zi nu rime
a bu nhne be bita tonji nu ikpechi nu bredi ariohna
Chiokike.

3 N'aznu ikpe obnosni ke ebo bu hne be kwu Hne
Kakwo Nso.

4 Nhne zi nu rime a bu ojo golu ke isensi, nu Igbe
Ogba-Njo-Ehni be wuru golu. Nu rime igbe wam,
nhne zi a bu otu ite golu mana, nu mkpara Eroni
ke waru okwukwo nu mbadamba akaworugwu
lawuru ke be bakwasiri iwu wam n'olu be.

5 N'olu igbe, ele enine izi be wuru owu zi ig-
wugwu be kwu Cherubim gbasaru akankwu be
kpusnirni ikpechi oru. A jeeuwe rikne kowa kpa be
kitna.

⁶ Nga be bīta kworu kpakara nhne, ele arīohna naabna n̄u hne zī ns̄o kpakara ōbochi n̄oornu ̄ernu be.

⁷ K̄ovu okwolem nye risi arīohna naabna n̄u Hne Kakwo Ns̄o n'azn̄u ikpe obnosni wam otu m̄gba n'awha. O jeeji ōvnarna ke o jeeji kpusni mmehie ke a n̄u mmehie ele Izirēli mernu n̄u ōma ama.

⁸ Enine Ns̄o neegesi kpa Oro-̄Eka Ns̄o ke mb̄om n̄u omen'̄eli a gwuzo k̄oriri, apna be jeeji naabna n̄u rime Hne Kakwo Ns̄o mesnirni emesni.

⁹ Ka b̄u nhne neegesi n'ige ka, n̄u nkesi n̄u arīohna be jiri kwan̄u Chiokike arīohna j̄eenwe rikne mee ele neegweya nkesi arīohna zu ozu.

¹⁰ Ka b̄u wiri n̄u manya n̄u mmemem ke ōsnusna, kpakara omen'̄eli ele ka b̄u nhne anya n̄oowhnu joogwuzo tem d̄u ige Chiokike jaagbanwo be.

Ovnarna Karāisi

¹¹ K̄ovu Karāisi var̄u lele nye risi arīohna nhne ke ka mma ke zī hna, Oro-̄Eka Ns̄o ke o n̄oornu ̄ernu n̄u rime a kakpa, zu mas̄i ozu. O b̄uo ke be jiri aka wu, ō b̄uo ke be keru eke n'̄owa ka.

¹² Nga Karāisi bnazn̄ernu n̄u rime Hne Kakwo Ns̄o, ō bnarn̄u otu m̄gba k̄poi. O j̄ile ōvnarna owu m̄obu ke nnw̄o ehni kwa arīohna, k̄ovu o ji ōvnarna ke a gbah̄ia kpakara āi ōkwnukokwnu.

¹³ Ōvnarna owu n̄u ehni n̄u nnw̄o ehni n̄u r̄etnu ke be wekwas̄iri ele z̄ila rīchna mernu be z̄iri rīchna n'olu ̄ehni.

¹⁴ Ō k̄o b̄uru ōvnarna Karāisi, nye hiri n'Enine Ns̄o ōkwnukokwnu gweru ̄ehni a kwa arīohna nw̄ée oru n̄u ruwhnu Chiokike, j̄osnusnama ak̄oniche āi wh̄oga n'̄ernu ōjo ke jaakpaya ̄enwu, ma a kpenu Chiokike ke zī b̄udnu.

15 Kam kpayarụ, Karaisi jiri buru nye agbata ke ọgba-njọ-ẹhni ikne, ma ele Chiokike sukwuru nwehia mkwna o kehia nhne kwó okwo. Kwnornu nụ ọ nwurru ẹnwu ma ọ zị kpa ọ gbahia be nụ rime awnụwhnu ke mmehie be mernu nụ mkpururu ọgba-njọ-ẹhni ke mbom.

16 Hne iwu oke mkpe zị, be jeegesiri nụ nye wam gbarụ a nwurru ẹnwu.

17 Kwnornu nụ iwu oke mkpe bụ nhne etekne hne nye gbarụ a zị budnu, kovu ọ jaabna n'ernu nga nye gbarụ a nwurru ẹnwu.

18 Ka bụ nhne kpayarụ nụ ọgba-njọ-ẹhni ke mbom jiri ọwusi ọvnarna gwuzosiri rikne.

19 Kwnornu nụ nga Mozizi kannu ele Izireli kpakara nhne iwu wam kwuru, o gweru ọvnarna nnwọ ehni gwagidne a mini, gweru hisopu nụ wuulu ihie whesi n'okwukwo iwu wam nụ kpakara ele badnu.

20 O kaa, “Anụ bno nsni, ka bụ ọvnarna ọgba-njọ-ẹhni ke anụ nụ Chiokike gbarụ, anụ bita a.”

21 Kpam masi, o whesiri Oro-Eka Nso ọvnarna nụ kpakara agbugba nụ nhne be ji zne izi.

22 N'ezi oka, ọ gwnarnu matị ọvnarna mee kpakara nhne ziri snam n'iwu, kwnornu nụ hne be wusage ọvnarna, ọgbaru mmehie zila.

Arịohna Karaisi noovume mmehie

23 Kam kpayarụ, Oro-Eka Nso ke ọwa ka nụ kpakara nhne zị nụ rime a, bụ oiyi nhne zị n'oligwe, bụ nhne be jeeji ọvnarna nọosnu, kovu nhne ke oligwe n'iwuhuru a piuru arịohna ke kakwo mma karu ọvnarna anohia.

24 Kwnornu nū Karaịsi bnáge nhne zị nsọ be jiri aka wu, ke bụ oyiya ke ọkwnamarna nhne. Kọvu ọ bnazernu oligwe hne o gwuzo nū ruwhnu Chiokike nū risi aị.

25 Nye risi ariọhna ele Ju naabna Hne Kakwo Nsọ otu mgba n'awha gweru ọvnarna anọhia. Kọvu Karaịsi znége o ji ẹhni a kwa ariọhna agịda ige.

26 Ọ bụru kpam, Karaịsi znernu ata awhnụwhnu agịda ige hite n'ọpanizo okike ọwa. Kọvu ọ whụyaru otu mgba kpọi kwnornu aị n'okwukwo ige ka, gweru ẹhni a kwa ariọhna ma o vume mmehie.

27 Ka bụ ezi ọka, badnụ jọonwuriri otu mgba, omekwo, ikpe Chiokike sno a.

28 Kpam masị, be jiri Karaịsi kwa ariọhna otu mgba o vume mmehie agịda ele badnụ, ọ jaava ke mgba lawwuru znọhia ele neele anya a hne mmehie zila a.

10

Karaịsi kwarụ ariọhna zuru ọhna otu mgba

1 Iwu wam bụ enine nhne ọma ke jaava, ọ bụo nhne wam, kam kpayarụ, o nwée rikne hite nū ariọhna ke be naakwa ige ọbula mee ele naava ọ kpọ risi ẹli zu ozu.

2 Ọ bụru nū ele neekpenu Chiokike zị rịchna nū rime ovu, ikpe mmehie ba mána be. Kpakara ọkwa ariọhna znernu okwome.

3 Kọvu kpakara ariọhna wam bụ nhne ke neechenwanyanụ be mmehie be hite n'awha dụ n'awha.

4 Kwnornu nū ọvnarna ehni nū owu nwée rikne vume mmehie.

⁵ Kam kpayarụ nga Karaisi varụ n'owa, ọ karụ,
 “Ariohna nụ nkesi ruwhnu oma másige i,
 kovu i bitannu m anọ-ehni o bnonu i nsni.

⁶ Ovu zá nọoso i n'onu
 kwnornu ariohna ọkporne bẹkwnu mọbu
 ariohna mmehie.

⁷ M kaa, ‘Chiokike, le, m valẹm
 o mee nhne i pioru me mee,
 lele kpa be gbarụ nhne gbasiri m n'ọkwukwo
 nsọ.’ ”

⁸ Ke mbom, ọ karụ, i pirole ariohna nụ nkesi
 ruwhnu oma, mọbu ariohna ọkporne bẹkwnu mọbu
 ariohna mmehie, ọ bụ n'ezi nụ iwu wam karụ be
 mee kpam.

⁹ O kaa, “Chiokike, le, m valẹm o mee nhne i
 pioru me mee.” O gwemernu nhne ke mbom ma
 ọ zị kpa o gwuzote nhne ke ẹbo.

¹⁰ Kwnornu nụ Jizọsi Karaisi mernu nhne
 Chiokike pioru o mee, ọ snusnamarnu mmehie
 aị hite n'ariohna ke o jiri ehni a kwa otu mgba ke
 zuru ohna.

¹¹ Nye ọkwa ariohna ọbula noogwuzo kpakara
 ọbochi nọornu ẹrnu a, naakwa otu ariohna agida
 ige. Kovu kpakara ariohna ka nwée rikne noovume
 mmehie.

¹² Kovu nga nye ariohna ka kwarụ ariohna ke
 zị ọkwukokwnu kwnornu mmehie, ọ daziri ẹli
 n'akarikwnunga Chiokike.

¹³ Hite n'ige wam, ọ zị neese ige Chiokike jaabita
 ele irno a lele nhne ọgbakwasi ọchi a.

¹⁴ Hite nụ otu ariohna, o mernu ele zị snam hite
 nụ mmehie zu ozu ọkwukokwnu.

15 Enine Nso naagbanu aị akebne ka hite nu
nhne o kwuru nu mbom,

16 “Ka bu njo-ehni ke me nu be jaagba,
n'obochi ke jaava, bu nhne Jihova kwuru,
m jeeyisi iwu m nu rime ovu be,
m jaagbakwasị be n'echiche be.”

17 O kaa kwno berere,
“M jeechenwanya aruru-eli be,
nu mmehie be berere.”

18 Kitna, o gbarunnu be kpakara mmehie be,
ariohna berere za kwnornu mmehie.

19 Kam kpayarụ, rumu nda m, a nwernu ovu siri
rikne o bnazne nu Hne Kakwo Nso hite n'ovnarna
Jizosi.

20 O gbamannu aị apna ikne ke zi budnu hite
n'ikpe obnosni wam ke bu anọ-ehni a.

21 A nwernu nye risi ariohna ke kakwo, nye
neelegidne oro Chiokike anya.

22 Ngwa ma a gweru mkpoma zi richna nu ezi
okwnata ovu, nu ovu ikpe mana vakwnusi Chiokike,
ya nu ehni be jiri mini zi richna snusnama.

23 Ngwa ma a knetasị olile anya ke okwnata ovu
aị aka rikne, kwnornu nu nye kweru aị mkwna
jaabita mkwna o kweru.

24 A gbalị mee nhne joovulizo owhnun'anya n'ovu
ibne aị hite n'ornu ernaloma.

25 A ghasa ogbako rumu nda n'otu lele kpa agwna
ele badnu neeme. Kovu a kwnagidne ibne aị ke
kakwo kpa obochi wam naava ndundu.

26 O buru nu a jaazi koriri neeme mmehie hne a
nurnu ezi oka wam, o za ariohna berere be jaakwa
kwnornu aị.

27 Kọvu nhne ke gwnarnu bu olile anya ke tu ogwnu ke ikpe, ya nu ke okne bekwnu ke jeerne ele neemegidne Chiokike.

28 Nye obula ke dnarnu Iwu Mozizi nwurnu enwu hne badnu lawuru mobu eto gbagidnenu a akebne, be donnu a obirizi.

29 Anu le kpa ikpe wam jaazi rikne bu awnwhnu nye wam jaata bu nye lednarnu Nnwọ Chiokike anya, nye kpoge onarna ogba-njo-ehni ke Chiokike nhne, ke snusnamarnu mmehie a, nye lednarnu Enine Nso ke oru anya.

30 Kwnornu nu a magwu nye karu, “Mawa nwe mmegwnahia, m jeemegwnarnu.” Jihova kwuru berere, “Jihova jeekpe ele ke a ikpe.”

31 O bu nhne tu ogwnu o dnabna n'aka Chiokike ke zi budnu.

32 Anu chenwanya obochi ele ke wheru ewhe kpa anu snurnu ovu kpa iwhne Karaisi mukwasiri anu nu rime kpakara awnwhnu.

33 Agwna ige anu buru ele be kpasiri iwhnerne n'ohna, ige berere anu dasiri ele berere be neemegbu emegbu n'ikwnu.

34 Anu donnu ele zi n'ikelu obirizi. Nga be nahoru anu nhne anu nwernu, ovu soru anu n'onu kwnornu nu anu magwu nu anu nwernu ekwnu ke jaazi okwnukokwnu n'oligwe.

35 Anu tuwhu ovu osi rikne anu, o jeenwe ogwo enu zi agida.

36 Anu snuta ovu ma anu nwernu rikne mee nhne Chiokike pioru, nahia masi nhne o kweru nu mkwna.

37 Kwnornu,
“Ige mati,

nye wam jaava bu nye jaava, o jóogbu ọkwnu.

³⁸ Kọvu, nye mee mma ke m jeehi n'ọkwnata ovu ziri budnu, ọ buru nu nye ọbula lahna aznu, nhne gbasiri a jóoso m ovu n'ọnu.”

³⁹ Kọvu a búo ele naalahna aznu, whu etekne, a bu ele kweru du n'ọznohia mkpuru ovu.

11

Ele dikne ke ọkwnata ovu

¹ Ọkwnata ovu bu ọdnabneru nu nhne a neele anya, nu ọtukwasi ovu nu nhne ke a whnúge anya zi.

² Hite n'ọkwnata ovu, ele gbaka nahiaru ruwhnu oma n'aka Chiokike.

³ Hite n'ọkwnata ovu, a ghohiaru nu Chiokike jiri ikwu-ọnu a ke ọwa, ke kpayaru, nhne a nọowhnu anya hi nu nhne a whnúge anya whuya.

⁴ Ebeli jiri ọkwnata ovu kwanu Chiokike ariohna ke ka ariohna Keni nwene a mma. Hite n'ọkwnata n'ovu a, Chiokike gbaru akebne nu ọ bu nye mee mma kwnornu nu Chiokike nahoru nkesi a. Hite n'ọkwnata n'ovu a, ọ zi koriri nookwu oka ọ bu n'ezi nu ọ nwuru ọnu.

⁵ Hite n'ọkwnata ovu, Inoku nwuna ọnu, kọvu Chiokike kwururu a nu budnu, be whnúna a, kwnornu nu Chiokike kwururu a. Kọvu su Chiokike kwururu a, be gbaru akebne a nu o mernu nhne sọru Chiokike ovu n'ọnu.

⁶ Hne ọkwnata ovu zila, be nwée rikne mee nhne jóoso Chiokike ovu n'ọnu. Kwnornu nu nye jaavakwnusi Chiokike jeekweri nu Chiokike zi, nu ọ bu nye nọokwu ele noopiosi a rikne ọgwo ọnu.

⁷ Hite n'òkwnata ovu, Noa tũru ògbo nga Chiokike dũru a aka nũ nsni nhne ke zĩ nũ ruwgnu, ò whnũna anya, ò tũ ògbo o jiri znòhia ele òro a. Ò marnũ òwa ikpe, kehĩa ome mma hite n'òkwnata ovu.

⁸ Hite n'òkwnata ovu, Ebereham bnornu nsni nga Chiokike sukwuru a zne òli ke o jeekehĩa nũ mkwna, ò whòga neezne hne ò máa.

⁹ Hite n'òkwnata ovu, o wuru n'òli Chiokike kweru a mkwna lele nye izne. O wuru n'òro-òka, ya nũ Aziki nũ Jekòpu, ele ya nũ be kehĩaru otu mkwna wam.

¹⁰ Kwnornu nũ Ebereham neele anya òli ke nwernu ntũ-òli, ke Chiokike bũ nye nka nũ nye wuru a.

¹¹ Hite n'òkwnata ovu, Sera nahĩaru rikne ò tũ rime nga o wheru ige, ò bũ n'ezi nũ o nwée nnwò* kwnornu o karũ nũ ò bũ nye kwesiri òkwnata ovu bũ nye kweru mkwna.

¹² Hite n'otu badnũ ka, Ebereham, ò bũ n'ezi ò nũ lele nye nwũrnu ònwu, hne avnũrnu a hna lele mbò ke oligwe nũ lele rĩzna ke zĩ nũ ngeri osimini hna ke nwée ònu ògwnugwnu.

¹³ Kpakara ele ka nwũrnu nũ rime òkwnata ovu. Be náhiage nhne Chiokike kweru mkwna, kòvu be whnũrnu be hite nũ hne zĩ ikere, gweru be, kwuhĩa nũ be bũ ele izne nũ ele neewhe ewhe n'òwa.

¹⁴ Nga ele badnũ nookwu kpa, ka neegesi nũ be neele anya òli ke aka be.

¹⁵ N'ezi òka, ò bũru nũ be naari òriri gbasĩri òli ke be hiri whũya, be znernu alahna aznũ.

* **11:11** mòbu *hite n'òkwnata ovu, Ebereham ghòru nda, ò bũ n'ezi o mernu okno badnũ, Sera n'iwururu a nwée nnwò*

16 Kịta, be neele anya ẹli ke ka mma, ẹli ke oligwe. Kam kpayaru, iwhnerne zá neeme Chiokike ma be sukwu a Chiokike be, kwnornu nu ọ bítannu be otu ẹli.

17 Hite n'okwnata ovu, Eberham gweru Aziki kwa ariohna nga Chiokike kparu a iru. Nye wam nahiaru mkwna wam jiri otu nnwo kpọ o nwernu kwa ariohna.

18 Ọ bu n'ezi nu Chiokike karu, “Hite nu Aziki, i jeenwe agida rumu.”

19 Eberham kweru nu Chiokike nwernu rikne mee Aziki hi n'enwu lizo, n'ezi oka, ọ nahoru nnwo a lele nye hi n'enwu lizo.

20 Hite n'okwnata ovu, Aziki goziri Jekopu nu Iso, nookwu oka gbasiri ngozi ke zi nu ruwhnu.

21 Hite n'okwnata ovu, Jekopu goziri rumu Josefu lawuru nga ọ nonwu enwu. Ọ dnabnernu nu mkpara a kpọ risi ẹli nyee Chiokike.

22 Hite n'okwnata ovu, Josefu nga ọ nonwu enwu kwuru nhne gbasiri okwnehala ke rumu Izireli n'eli Ijipiti, nyee be iwu gbasiri okpukpu a.

23 Hite n'okwnata ovu, ele munu Mozizi tugwaru a enwa eto kwnornu nu ọ bu nnwo zi ichne, ogwnu iwu eze tula be.

24 Hite n'okwnata ovu, Mozizi, nga o sopiyaru nu badnu, kwéle be sukwu a nnwo adna Fero.

25 O snornu rumu Chiokike ta awhnwhnu kanu a mma kakwo o nwe ovu oso n'onu ke mmehie ige mati.

26 O gwnurnu nhne iwhnerne ke Karaisi nhne zi okne onu ahia kakwo kpakara ekwnu ke Ijipiti, kwnornu nu o neele anya ogwo ernu ke zi nu ruwhnu.

27 Hite n'òkwnata ovu, ọ sịgbasiri ẹli Ijipiti, ọ túla ogwnu ovu owe ẹhni ke eze, kwnornu nù o gwuzoru kwem lele nye whnurnu Chiokike wam be whnú anya, anya.

28 Hite n'òkwnata ovu, o miteru Iriri Oḡawhe nù ọvnarna be wesarù ma enine izi ẹnwu wam ke gburu kpakara nnwọ mbọm be murnu gharù o gbu nnwọ mbọm ele Izireli.

29 Hite n'òkwnata ovu, rumu Izireli wheru Osimini Ihie lele ẹli etekne, nga ele Ijipiti pioru ma be whe, mini riri be.

30 Hite n'òkwnata ovu, oghiri mkpọ Jeriko dnarnù, nga ele Izireli gbarù a gburugburu ọbochi ẹsau.

31 Hite n'òkwnata ovu, nwerinya ewhere Rehabù ziri budsonu, be gbúkọtala ya nù ele irno Chiokike, kwnornu nù o tugwaru ele znernu o nyokahia ẹli wam.

32 Ndaa nhne me jookwu, kwnornu nù ige zila me jookwu nhne gbasiri Gidiọni, nù Baraki, nù Samsini, nù Jẹfita, nù Devidi nù Sameli, nù kpakara ele ọwhnurninya.

33 Ele hiri n'òkwnata ovu lugbu ẹli-eze, rnù ẹrnu ọma, nahia mkwna, kpusni ọnu odum,

34 kpachni bẹkwnu noonwu onwu, gbanahoru ama-ogwnu, be nwée rikne, kọvu be ghọru ele dikne, ele dikne n'ogwnu, chihala ele ogwnu ẹli berere.

35 Ele rinya nahiaru ele ke be hiri n'ẹnwu lizọ. Be tarù ele berere awhnùwhnu, kọvu be kwéle be dọhia be, ma be lizọ n'ẹnwu ke ka mma.

36 Be mernu ele berere nhne rumu, pnia be hna, owe, be knernù ele berere eriri, yisi be n'ikelu.

37 Be t̄uru be akaworugwu, be kw̄obiri be ẹbo, be jiri ama-ogwnu gbu be, be woru akp̄ukpo owu n̄u atn̄urnu gbaghari, be gh̄o ele mboni, be kpakna be ẹhni, megidne be.

38 Ele ọwa kw̄ésile ele ka. Be gaghari lele ele nw̄ée ọro n'ẹli-ikpa n̄u rugwu mati, be wuru n̄u rime mkpewu n̄u ọnunu ẹli.

39 Kpakara ele ka nwernu ọtnutnu ọma kwnornu n'okwnata ovu be, k̄ovu be náhiage mkwna wam.

40 Chiokike bītannu āi nhne ka mma. Chiokike mernu ma āi n̄u be zuk̄ota, ma a b̄uru ele zuru ozu n'otu.

12

Chiokike naap̄n̄ia r̄umu a nhne

1 Kam kpayar̄u, hne a nwernu aḡida ele akebbe gbar̄u āi gburugburu, a tuwhu kpakara nhne ke noobnosni āi n̄u mmehie ke naatakwnusi n'ẹhni āi, ma a gweru ọkasi mkp̄oma gba ẹso ke z̄i āi n̄u ruwhnu.

2 A neelegidne Jiz̄osi anya, nye t̄uru nt̄u-ẹli n̄u nye mekwakworu ọkwnata ovu āi. Nye kwnornu ovu ọso n'ọnu ke z̄i a n̄u ruwhnu li nhne igbugbu ke ọgba, gweme iwhnerne, ọ daz̄iri ẹli k̄itna n'akarikwnunga ngadna eze Chiokike.

3 An̄u tule nhne gbas̄iri nye wam ke l̄iri nhne igbugbu ke ọgba n̄u omegidne ke ele mmehie, rikne b̄o gw̄u an̄u, an̄u dna n'apna.

4 N̄u rime ogwnu an̄u n̄olu megidne mmehie, an̄u ȳooluge ogwnu d̄u n'owusa ọvnarna an̄u n'ẹnwu.

5 An̄u chezuru ikwu-ọnu ọkasi ovu wam ke Chiokike nookwu an̄u lele r̄umu,

“Nnwọ m, i lédna ọdo aka nụ nsị ke Jihova anya,
ovu lákwadia anụ mini nga o bigbọru anụ.

⁶ Kwnornu nụ Jihova naata ele ọ whnụrnu n'anya
awhnụwhnu,
naapnịa nye ọbula o kwuru nnwọ a nhne.”

⁷ Anụ nabnarnụ awhnụwhnu anụ naata lele ọdo
aka nụ nsị ke nda nọodo rụmu a. Anụ whnụlele
nnwọ ke nda a zá nọodo aka nụ nsị sa?

⁸ Ọ bụru nụ Chiokike zá nọodo anụ aka nụ nsị
lele ele berere, anụ bụo rụmu a, kọvu anụ bụ rụmu
ọyi.

⁹ Nda aị k'owa nọodo aị aka nụ nsị, a noobnonu
be nsị. A kwesiri o bnonu Nda aị ke enine aị nsị
karukwo ma a ziri bụdnu.

¹⁰ Nda aị k'owa naapnịa aị nhne ige matị n'ovu
ọso n'onu be, kọvu Chiokike naapnịa aị nhne
kwnornu mbnarna ke aị, ma a snornu a kehia ọzi
nsọ a.

¹¹ Ọ zá ọdo aka nụ nsị ọbula ke nọoso ọso
n'ige wam, kọvu ọ zị igbugbu. Omekwo, ọ mịpiya
ezi mkpuru ke ome mma nụ udno nụ rime ele
gawheru nụ rime a.

¹² Kam kpayaru, anụ mee aka ke dnarnụ adna
lizo nụ mkpnerne ọchi ke nwée rikne gwuzoru
kwem.

¹³ Anụ zne izne n'apna ke sniri asị ọ zị ele
nwée ọchi ba dna n'apna, tñunuma, be gwọ be.

Ọ do aka nụ nsị

¹⁴ Gbalị ma jị nụ kpakara ele badnụ ziri n'udno,
ziri masị nsọ, kwnornu nụ ọ zá nye jọowhnu
Chiokike anya sụ ọ zila nsọ.

¹⁵ Anụ whnụ nụ ọ zá nye dnahalaru n'oru ke
Chiokike. Ọ zị nye nụ lele ẹgwngwnu luga nlulu

n'esilawuru anụ ke joovuyanụ anụ mkpa, hite nụ a mejọ agịda badnụ.

¹⁶ Anụ whnụ nụ ọ zá nye neeme ọyi mọbu nye zá nọosonu Chiokike anya lele Iso, nye kwnornu otu mgba wiri re ọnodi ọpnarna a.

¹⁷ Anụ mahiari, omekwo, o pioru ọ nahoru ngozi nda a, oghere zila kwnornu nụ o nwée rikne gbanwo nhne o mernu, ọ bu n'ezi nụ o jiri anyamini ẹkwna piosi ngozi wam rikne.

¹⁸ Anụ váduge nụ rugwu ke anụ jeemetu aka, lele rugwu Saina ke neerne bẹkwnu, nụ ọchichiri, okne ogwnu nụ okne ruwhere,

¹⁹ nụ ọdidna ke ọkwodu nụ ọdidna nkọli ke ele nurnu a, riasno nkọli wam kwúma berere.

²⁰ Kwnornu nụ be gwúzolige iwu wam ke karu, “Ọ bụbedi anọhia vadu rugwu wam metu a aka, be gweru ara tugbu a.”

²¹ Nhne Mozizi whnurnu zi okne ogwnu, ọ kaa, “Ogwnu turu m, ẹhni nọoznu m biri biri.”

²² Kọvu anụ vaduru rugwu Zayoni, bu Jeruselem ke oligwe, ẹli-ọhna ke Chiokike ke zi budnu, nụ ele enine izi, ọ zá nye nọogwnuli ọnu, ele neetne eri ọnwudna.

²³ Anụ vadulem ọgbako Chiokike ke rumu be beru ọsno mu, ele be gbaru rewhna be n'oligwe, vakwnusi masi Chiokike, nye neekpe kpakara ele badnu ikpe, nụ enine ke ele ome mma zuru ozu.

²⁴ Anụ vakwnusiri Jizosi, nye ibno ke ọgba-njọ-ẹhni ikne, nụ ọvnarna ke owhesa, ke nookwu nhne ke ka mma kakwo ọvnarna Ebeli.

²⁵ Anya du anụ ẹli, anụ whnụ nụ anụ gháruła ọ nurnu nhne nye wam nookwu. Ọ buri nụ ikpe marnu ele wam bnóne nsni nhne nye wam zi

nọodo be aka nụ nsni n'owa kwuru, ndaa kpa a jaagbanahoru, o buru nụ a bnóne nsni nhne nye wam zị n'oligwe nọodo aị aka nụ nsni nookwu?

²⁶ Nkọli a mernu ọwa znu biri biri n'ige wam, kovu kitna, o kweru mkwna kaa, “Berere kwno, m jeeme o buo ọwa kpọi znu biri biri, kovu oligwe masi.”

²⁷ “Berere kwno” neegesi nụ o jeegweme kpakara nhne nọoznu biri biri bu nhne be keru eke, ma nhne ke zá nọoznu biri biri gwuzosi rikne.

²⁸ Hne a nanahoru eli-eze ke zá nọoznu biri biri, a tūnu Chiokike mmamma, kwnakwu a kpa o joso a n'onu, nū ogwnu nū oso anya.

²⁹ Kwnornu nū Chiokike bu bekwu neerne erne.

13

Kpa be wu budnu jaamasị Chiokike

¹ Anụ nọowhnu ẹhni anụ n'anya lele rumu nda.

² Anụ chézu elekota ele izne, kwnornu nū agwna badnu lekotaru enine izi hne be máa.

³ Anụ chenwanya ele zị n'ikelu lele nū anụ nū be zị n'ikelu. Anụ chenwanya ele naata awnūwhnu lele nū anụ nū be sno naata awnūwhnu.

⁴ Anụ sobisinu olulu nzi nū nnwerne. Anụ méru okpata nzi nū nnwerne kwnornu nū Chiokike jeekpe ele neeme oyi nū ele ewhere ikpe.

⁵ Anụ kwé ọwhnun'anya iwai neechi mkpoma anụ, nhne anụ nwernu ji anụ ruwho, kwnornu nū Chiokike karu,

“M jáaghasa anụ rịa rịa,
m jáasa anụ aka rịa rịa.”

6 Kam kpayarụ, a ji ovu siri rikne kaa,

“Jihova bụ nye neenyinu m aka,
ogwnu zá nọtu m nhne badnụ jeeme m.”

7 Anụ chenwanya ele risi anụ wheru ewhe, ele kwunnu anụ ikwu-ọnu Chiokike, kpa be wuru bụdnu be, kpa be nwurru ẹnwu, anụ snornu ọkwnata ovu be.

8 Jizọsi Karaịsi zị kpa ọ zị, ekile, tna, dụ ọkwnukokwnu.

9 Anụ kwékwadia iznizni ikne ọbula zị ichne ichne kwnapụ anụ n'apna. Ọ ka mma mkpọma aị gwuzosi rikne n'oru Chiokike, ọ bụo nụ omen'ẹli wiri zị ichne ichne ke zá naabnanụ ele neeri a mbnarna ọbula.

10 A nwernu ojo ke ele naakwa ariọhna n'Ọro-Ẹka Nsọ nwée rikne ri nhne zị nụ olu a.

11 Kwnornu nụ nye risi ariọhna neegwebna ọvnarna anọhia be gburu lele ariọhna mmehie nụ rime Hne Kakwo Nsọ, kọvu be nọokporne ọkpna anọhia wam bẹkwnu n'aznụ ẹli-ọhna.

12 Kam kpayarụ, Jizọsi tarụ awhnụwhnu n'aznụ ẹli-ọhna ma o gweru ọvnarna a bita ele badnụ nsọ.

13 Ngwa ma a znekwunusi a n'aznụ ẹli-ọhna vuru masị iwhnerne a.

14 Kwnornu nụ a nwée ẹli-ọhna ke jaadazigidne hna, kọvu a neele anya ẹli ke naava nụ ruwhnu.

15 Ngwa ma a znarni Chiokike ige ọbula, ma ọ bụru ariọhna hite nụ Jizọsi, ka bụ nhne nkesi ke hi aị n'ovu, hite n'ọnu nookwuhia nụ ọ bụ Nyenwe aị.

16 Anụ chenwanya, neeme nhne ọma ya nụ neekesi ele badnụ nhne anụ nwernu, kam bụ ariọhna ke nọoso Chiokike ovu n'ọnu.

17 Anụ bno nsni, anụ b̄ita ẹhni anụ nụ mkpururu ele risi anụ, kwnornu nụ be neelegidne anụ anya lele ele jaasa ajiji nụ ruwhnu Chiokike, ma be rñ ẹrnu be n'ovu ọma, ọ b̄uo nụ ovu owe ẹhni, ke zá bnanụ anụ mbnarna ọbula.

Obekwu ikwu ipne-aznu

18 Anụ kpenu aị okpukpe. A magwụ nụ ovu aị zị r̄ichna kwnornu nụ a pioru o mee nhne b̄uru ọma ige ọbula.

19 M naariaso anụ kpenu m okpukpe ma m vakwnusi m anụ wara wara.

20 K̄itna, Chiokike udno nye mernu Nyenwe aị Jizọsi hi n'ẹnwu lizọ, nye b̄u Okne Nye Znu Atn̄rnu wam, hite n'ọvnarna ọgba-njọ-ẹhni kwó okwo,

21 nyee anụ kpakara nhne b̄uru ọma o mee echiche a. O gweru masi aị mee nhne masiri a, hite nụ Jizọsi Karaịsi nye nwe igwugwu ọkwnukokwnu. Amim.

22 R̄umu nda m, anụ bno nsni n'ikwu-ọnu ezni ke me kwuru, kwnornu nụ ọkwukwo me gbarụ zá ogologo.

23 Anụ mahia nụ nnwọ nda aị Timoti whuyalam n'ikelu. Ọ b̄uru ọ va ngwa ngwa, me nụ a joosno va lekasi anụ.

24 Anụ bekwu kpakara ele risi anụ nụ kpakara r̄umu Chiokike. Ele Itali neebekwu anụ.

25 Oru Chiokike dazinu kpakara anụ.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwere - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89